

CONVENIO DE COLABORACIÓN ENTRE A CONSELLERÍA DO MAR E A FUNDACIÓN NUEVA PESCANOVA, PARA ORGANIZACIÓN DO "GLOBAL SUSTAINABLE SEAFOOD GALICIA FORUM" (FORO GALICIA DE SUSTENTABILIDADE GLOBAL DOS PRODUTOS DO MAR) EN 2026

En Santiago de Compostela, na data e hora da sinatura dixital,

REUNIDOS

Dunha parte, dona Marta Villaverde Acuña, conselleira do Mar, nomeada polo Decreto 35/2025, de 4 de xuño, actuando en nome e representación da Consellería do Mar, en virtude das facultades recoñecidas polo artigo 34 da Lei 1/1983, do 22 de febreiro, de normas reguladoras da Xunta e da súa presidencia.

E doutra, José María Benavent Valero, en calidade de persoa física representante de NUEVA PESCANOVA, S.L., patrón e presidente da Fundación Nueva Pescanova, con sede en Rúa José Fernández López, s/n, 36320, Chapela-Redondela (Pontevedra), inscrita no Rexistro de Fundacións con data 4 de outubro de 2022, actuando na súa representación, de conformidade coa escritura de constitución de 1 de setembro de 2022 outorgada polo notario José Luis Espinosa de Soto co número 2192 do seu protocolo.

EXPOÑEN

PRIMEIRO:

Que a actividade pesqueira, marisqueira e acuícola é un dos principais motores da economía galega que sitúa a Galicia, pola riqueza da súa produción, como a primeira das comunidades pesqueiras da Unión Europea.

SEGUNDO:

Que o Estatuto de Autonomía de Galicia atribúe á Comunidade Autónoma, no seu artigo 28º, a competencia para o desenvolvemento legislativo e a execución da lexislación do Estado no ámbito da ordenación do sector pesqueiro. Neste sentido o artigo 3.4 da Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, inclúe dentro das materias correspondentes á competencia da Comunidade Autónoma as relativas á ordenación do sector pesqueiro galego, á ordenación das estruturas, aos mercados, á comercialización, á manipulación, á transformación e á conservación dos produtos pesqueiros.

Neste sentido, a Consellería do Mar ten entre os seus obxectivos prioritarios a potenciación, difusión e promoción dos sectores e produtos pesqueiros galegos, co fin de intensificar o coñecemento dos mesmos e incrementar así a súa competitividade.

Para poder acadar estes obxectivos, resalta a importancia de que a administración galega identifique determinadas situacións puntuais que poidan comprometer o rendemento e incluso a viabilidade das empresas da cadea mar-industria galega e colabore cos actores precisos para paliar os efectos nocivos destas situacións.

TERCEIRO:

Que a Fundación Nueva Pescanova é una institución que persegue o fomento, o financiamento, o desenvolvemento e a execución de todo tipo de actividades que, en relación coas actividades pesqueiras, acuícolas, de elaboración e comercialización, contribúan, entre outros, ao desenvolvemento sostible nas vertentes sociais, medioambientais e económicas, e á investigación, desenvolvemento, innovación e divulgación.

Dentro desta liña de actuacións foi a organizadora da primeira, segunda e terceira edición do "GLOBAL SUSTAINABLE SEAFOOD GALICIA FORUM", en 2023, 2024 e 2025, a través da sinatura dos respectivos convenios entre a Fundación Nueva Pescanova e a Consellería do Mar. A terceira edición contou coa participación de máis de 300 profesionais de 30 países e debateuse sobre a medición da sustentabilidade dos produtos do mar.

Que por canto a Consellería do Mar e a Fundación Nueva Pescanova están interesadas na potenciación do sector da pesca e da acuicultura, así como na mellora do nivel de vida das xentes que viven del, é polo que cómpre establecer as condicións que permitan a coordinación de aquelas accións que repercutan nunha mellora da comprensión das dinámicas socioeconómicas e na anticipación da resposta aos retos que enfrenta o sector dos produtos do mar.

A industria pesqueira e acuícola e a súa cadea de valor ten ante si o importante desafío de responder á demanda crecente de proteína de orixe mariña de calidade á vez que garantir o emprego digno, o valor compartido ao longo da cadea e un océano san e produtivo para as xeracións futuras.

Galicia, rexión de longa tradición pesqueira e acuícola, terra de mariñeiros e de emprendedores, asume o reto de acoller un debate aberto, global e inclusivo, sobre a actuación responsable, a sustentabilidade dos produtos do mar e o papel que estes xogan para alcanzar un océano san e produtivo hoxe e nun futuro.

Nesta liña, a Fundación Nueva Pescanova, propón organizar unha cuarta edición do evento que, co nome de IV GLOBAL SUSTAINABLE SEAFOOD GALICIA FÓRUM: A medición da sustentabilidade, responsabilidade empresarial e impacto, se celebrará en Vigo no ano 2026.

CUARTO:

Que o Regulamento (UE) 2021/1139 do Parlamento Europeo e do Consello, do 7 de xullo de 2021, polo que se establece o Fondo Europeo Marítimo, de Pesca e de Acuicultura e polo que se modifica o Regulamento (UE) 2017/1004, establece no seu artigo 3 que o FEMPA contribuirá á aplicación da PPC e da política marítima da Unión, tendo entre as súas prioridades a de fomentar as actividades sustentables de acuicultura, así como a transformación e comercialización de produtos da pesca e a acuicultura, contribuíndo así á seguridade alimentaria na Unión (Prioridade 2).

No artigo 26 do devandito Regulamento (UE) 2021/1139, establécese que o apoio no marco desa prioridade 2 abarcará intervencións que contribúan á consecución dos obxectivos da PPC establecidos no artigo 2 de Regulamento (UE) 1380/2013, por medio de determinados obxectivos específicos, entre os que se atopan o de promover a comercialización, a calidade e o valor engadido dos produtos da pesca e da acuicultura.

O programa “Fondo Europeo Marítimo, de Pesca e de Acuicultura: Programa para España” contempla, de cara a acadar o obxectivo específico 2.2 a través da “mellora da comercialización mediante campañas de promoción dos produtos pesqueiros e acuícolas. Feiras”, apoiar accións de promoción dos produtos pesqueiros e acuícolas, mellorando o coñecemento de, entre outros, os produtos procedentes da pesca extractiva. En concreto, contéplase apoiar operacións consistentes en campañas de comunicación e promoción dos produtos e a actividade de pesca sostible, a organización e participación en feiras, congresos, eventos, seminarios e exposicións, promoción de produtos con dificultades para a súa introdución no mercado, así como proxectos de comunicación e promoción, co obxecto de avaliar e planificar campañas de promoción dos produtos e as actividades da pesca e a acuicultura e a busca de novos mercados.

Deste xeito o Programa apoia, entre outras moitas accións relacionadas, potenciar o coñecemento da actividade pesqueira e acuícola.

Polo tanto, o obxecto do presente convenio considérase que cumpre cos requisitos de elixibilidade (S) establecidos no Programa Operativo do FEMPA 2021-2027 de España.

Así mesmo, consideraranse elixibles (S) tódolos custos, IVE incluído, segundo o previsto no artigo 64 do Regulamento (UE) 2021/1060, do Parlamento Europeo e do Consello, do 24 de xuño de 2021, polo que se establecen as disposicións comúns relativas ao Fondo Europeo de Desenvolvemento Rexional, ao Fondo Social Europeo Plus, ao Fondo de Cohesión, ao Fondo de Transición Xusta e ao Fondo Europeo Marítimo, de Pesca e de Acuicultura, así como as normas financeiras para os devanditos Fondos e para o Fondo de Asilo, Migración e Integración, o Fondo de Seguridade Interior e o Instrumento de Apoio Financeiro á Xestión de Fronteiras e a Política de Visados.

Ademais, de conformidade co disposto no artigo 41 do REGULAMENTO (UE) N° 2021/1139, do 7 de xullo, polo que se establece o FEMPA, a porcentaxe do investimento elixible é do 100% e, en aplicación do seu artigo 40, a porcentaxe de cofinanciamento polo FEMPA é do 70 %.

QUINTO:

Que a Consellería do Mar, de acordo co establecido no artigo 2 da Lei 11/2008, de pesca de Galicia, debe desenvolver unha política pesqueira que teña por finalidade a viabilidade duradeira do sector pesqueiro, marisqueiro e acuícola galego, garantindo a mellora das condicións de vida e traballo das persoas que se dedican a estas actividades mediante a explotación sustentable, equilibrada e responsable dos recursos baseada nun asesoramento científico sólido e tendo en conta os aspectos ambientais, económicos e sociais.

Deste xeito, entre as competencias que ten encomendadas, a realización de accións de promoción e de posta en valor desa sustentabilidade dos produtos do mar galegos fronte ao consumidor final, constitúe un dos principais eixes da política de mellora de comercialización pesqueira, xa que logo repercute directamente sobre a demanda deses produtos.

Neste sentido, e dentro do marco de actuacións da Consellería do Mar, figuran como accións fundamentais deste proceso a participación e colaboración da consellería con entidades significativas que teñan como finalidade dar a coñecer, entre outros, os produtos procedentes da pesca extractiva.

SEXTO:

Que por canto a Consellería do Mar e a Fundación Nueva Pescanova están interesados en continuar potenciando un debate global en Galicia para a busca de propostas para unha

mellor sustentabilidade dos produtos do mar nas súas tres vertentes, social, ambiental e económica e da imaxe internacional de Galicia como líder en sustentabilidade dos produtos do mar, cómpre establecer as condicións que permitan a coordinación de accións de promoción dos produtos pesqueiros e acuícolas.

Polo tanto, no marco do presente convenio, desenvolveranse diversas accións de promoción do sector e mellora da comercialización a través da organización da cuarta edición do "GLOBAL SUSTAINABLE SEAFOOD GALICIA FORUM", a celebrar de forma presencial e telemática no ano 2026, sendo esta actividade de mutuo interese para ambas entidades, en tanto que esta actividade redundará nunha mellora do desempeño do sector pesqueiro e na realización dos obxectivos comúns de ambas entidades.

Que para o desenvolvemento das actividades que se indican máis adiante, as partes, de forma conxunta, dispoñen de medios humanos e materiais suficientes.

Na súa virtude, e dada a existencia dun interese coincidente, ambas partes acordan formalizar o presente convenio de acordo coas seguintes:

CLÁUSULAS

PRIMEIRA.- OBXECTO DO CONVENIO

O obxecto do presente convenio é establecer as bases de colaboración entre a Consellería do Mar e a Fundación Nueva Pescanova, para a realización de diversas accións de promoción e mellora da imaxe de sustentabilidade do sector marítimo pesqueiro de Galicia, a través da celebración da cuarta edición do "GLOBAL SUSTAINABLE SEAFOOD GALICIA FORUM" en 2026.

As accións específicas que se van a realizar derivadas deste obxecto son as que seguen:

" GLOBAL SUSTAINABLE SEAFOOD GALICIA FORUM ":

Por parte da Fundación Nueva Pescanova:

- Diseñar, promocionar e organizar a asistencia da cuarta edición da “GLOBAL SUSTAINABLE SEAFOOD GALICIA FORUM” de representantes de todos grupos de interese rexional, nacional e internacional relacionados coa sustentabilidade dos produtos do mar, cun obxectivo de 300 participantes cunha importante participación internacional.
- A proposta de contidos e asuntos a debater que sobre o tema do desempeño empresarial responsable e o impacto positivo será potencialmente e de modo exemplificativo a seguinte:
 - Conferencia inicial: a transformación azul...
 - Práctica da pesca responsable e impacto positivo.
 - Práctica acuícola responsable e impacto positivo.
 - Transformación responsable dos produtos do mar e impacto positivo.
 - Acción comercial responsable e impacto positivo.
 - Innovación científica y empresarial e impacto positivo.
 - Conferencia de clausura: sobre o impacto.
- Organización previa do evento a celebrar no primeiro semestre de 2026 en Vigo.
- Elaboración, edición e distribución da documentación necesaria.
 - Xestión da axenda dos poñentes (figuras nacionais e internacionais relevantes no sector)
 - Dirección técnica, produción e comunicación.
 - Procura de colaboradores (Consellería do Mar da Xunta de Galicia, FAO, GSSI, outros...)
 - Planificación e organización de eventos de atracción de asistentes.

Por parte da Consellería do Mar:

- Apoio á organización do evento (que inclúe gastos de persoal, sede, medios audiovisuais, edición de programas, intérprete, etc.).
- Apoio á calidade dos contidos do Congreso a través da programación de poñentes de recoñecido prestixio.

SEGUNDA.- CONDICIÓN ECONÓMICAS

A Consellería do Mar contribuirá á realización das accións comprendidas no obxecto do presente convenio cunha achega económica, que ten como finalidade compensar á Fundación Nueva Pescanova polos gastos nos que incorre como consecuencia de levar a cabo as actuacións obxecto do mesmo, cifradas na cantidade de setenta e cinco mil seiscentos vinte e cinco euros (75.625,00 €), IVE incluído, con cargo a aplicación orzamentaria 16.02.723B 640.0, código de proxecto 2023 00197 S, da Lei 4/2024, do 27 de decembro, da Lei 4/2025, de 23 de decembro, de orzamentos xerais da Comunidade Autónoma de Galicia para o ano 2026, sendo esta partida económica axeitada para asumir o custo desta acción por considerarse, pola súa propia natureza, como un activo configurado como un investimento de carácter intanxible que deberá incrementar o valor das políticas públicas acometidas pola Consellería do Mar neste ámbito e que non dará lugar a investimentos reais de carácter material.

Para a realización das accións obxecto deste convenio, a Fundación Nueva Pescanova contribuirá cun máximo de setenta e cinco mil seiscentos vinte e cinco euros (75.625,00 €), IVE incluído, achega na que se poderán asignar custos de estrutura (persoal, materiais, instalacións, equipamento, etc.) que a entidade empregue no desenvolvemento das accións contempladas na cláusula primeira e responsabilizarse de organizalas na súa totalidade, en estreita colaboración coa Consellería do Mar.

De conformidade ao establecido no artigo 54. b) do Regulamento 2021/1060, polo que se establecen as disposicións comúns ao FEDER, FS+ FC, FTX e FEMPA, serán elixibles os custos indirectos nos que incorra a entidade na súa execución ata un máximo do 15 % dos custos directos de persoal que se xustifiquen con cargo ao convenio.

No caso de que a execución das actividades contempladas na cláusula primeira e realizadas no marco deste convenio de colaboración non supoñan o gasto da cantidade máxima prevista nos parágrafos anteriores, cada unha das partes asinantes deberá asumir o 50% dos gastos nos que efectivamente incorran, coa excepción de que a comisión de seguimento prevista na cláusula quinta emita outro ditame.

A tramitación do presente convenio é ordinaria e existe crédito suficiente previsto na Lei 4/2025, do 23 de decembro, de orzamentos xerais da Comunidade Autónoma de Galicia para o ano 2026.

As actuacións recollidas no presente convenio (Anexo I) fináncianse nun 70 %, co Fondo Europeo Marítimo, de Pesca e de Acuicultura (FEMPA). Faise constar tamén a elixibilidade da actuación que se pretende a través da contratación que se propón no marco da Prioridade da Unión, Obxectivo e Medida do FEMPA: 2.2.2. "Mellora da comercialización mediante campañas de promoción dos produtos pesqueiros e acuícolas. Feiras", prevista no artigo 26 Regulamento (UE) 2021/1139. Esta participación farase constar en todas cantas actuacións se realicen ao abeiro deste convenio.

A Fundación Nueva Pescanova empregará a totalidade da achega económica desta cláusula nas accións derivadas do obxecto deste convenio, non obtendo ningún beneficio económico desta consignación orzamentaria.

Farase un único pago contra a presentación das facturas polos investimentos inmateriais realizados, aos que se xuntarán certificacións actualizadas expedidas por cadansúa administración que acrediten que a entidade está ao corrente nas súas obrigas tributarias e sociais, así como que non ten débedas pendentes contraídas coa Administración da Xunta de Galicia. As facturas deberán ser conformadas pola Dirección Xeral de Pesca, Acuicultura e Innovación Tecnolóxica para estes efectos.

A Fundación Nueva Pescanova achegará unha declaración doutras axudas para a mesma finalidade do convenio e xunto coa documentación presentará a conta de resultados en relación á finalidade do convenio que abrangue todos os gastos e ingresos nos que se incorra na organización do evento obxecto do convenio.

Para facer efectivo o pagamento presentarán a memoria á que se fai referencia na cláusula terceira seguinte.

TERCEIRA. - OBRIGAS

A Fundación Nueva Pescanova obrígase a realizar as accións especificadas na cláusula primeira do presente convenio.

No marco do presente convenio, a Fundación Nueva Pescanova obrígase a facer constar a participación da Xunta de Galicia e do Fondo Europeo Marítimo, de Pesca e de Acuicultura (FEMPA) nas exhibicións publicitarias que teñan lugar no marco deste convenio.

A Fundación Nueva Pescanova obrígase a planificar e coordinar, xunto coa Consellería do Mar, as actividades e eventos a celebrar dentro do marco do presente convenio e o plan de comunicación aparelado a este, notificando coa maior antelación posible e, en calquera caso, nun prazo nunca inferior a un mes, as datas e programa provisional dos mesmos.

Finalmente, e antes do 30 de novembro do 2026, presentará diante da Consellería do Mar unha memoria descritiva da realización do obxecto do convenio, así como unha conta de resultados en relación á finalidade do convenio, que abrangan todos os gastos e ingresos nos que se incorreu na organización das accións obxecto do convenio.

Ademais, deberá achegar xustificantes dos gastos realizados, que consistirán, de forma xeral, nas facturas desagregadas e demais xustificantes de gasto de valor probatorio equivalente, contratos (de obra ou servizo) e nóminas, detallados o máximo posible. Así mesmo, deberá presentar xustificantes de pago referidos ás facturas e demais xustificantes de gastos achegados. Os xustificantes bancarios deberán soportar o número de factura ou facturas pagadas, no caso de transferencias, así como o beneficiario, importe, emisor e data, entre outros, de tal xeito que se poida seguir a rastrexabilidade da operación xustificada.

CUARTA.- RÉXIME DE PERSOAL

A realización das actuacións previstas neste convenio non levará consigo ningún tipo de relación de carácter laboral entre a Consellería do Mar e as persoas que interveñan ou puideran intervir na súa execución, sendo a Fundación Nueva Pescanova responsable das obrigas sociais e laborais que se puideran derivar da contratación, pola mesma, do referido persoal.

QUINTA.- SEGUIMENTO

Aos efectos de coidar do cumprimento do estipulado no presente convenio créase unha Comisión de Seguimento do mesmo, que estará composta pola persoa responsable da Subdirección Xeral de Valorización dos Produtos do Mar, ou persoa en quen delegue, en representación da Consellería do Mar e polo presidente do padroado da Fundación Nueva Pescanova, ou persoa na que este delegue, en representación da mesma.

A dita comisión, que se xuntará a petición de calquera das partes, será o mecanismo de actuación conxunta para garantir a efectividade do convenio. Esta Comisión de Seguimento garantirá ademais que as achegas financeiras que se comprometan a realizar os asinantes non superan os gastos derivados da execución do convenio.

Será necesario que, con anterioridade á execución das diferentes actividades, a Consellería do Mar dispoña de toda a información dos eventos e que dea o seu visto e prace antes da súa realización. Neste senso, a Fundación Nueva Pescanova atenderá ás indicacións, suxestións e requirimentos que se lle formulen desde a Consellería do Mar en relación co obxecto do presente convenio.

SEXTA.- VIXENCIA

A vixencia do presente convenio estenderase desde a súa sinatura e ata o 30 de decembro de 2026, non sendo susceptible de prórroga.

As actuacións elixibles no marco do presente convenio non poderán ser posteriores ao 30 de novembro de 2026.

SÉTIMA.- RESOLUCIÓN

Serán causas de resolución do convenio as previstas legalmente. En caso de resolución do convenio, os efectos da mesma, rexeranse polo establecido na lei.

OITAVA.- CARÁCTER DO CONVENIO.

Este convenio ten a natureza dos previstos no artigo 6 da Lei 9/2017, de 8 de novembro, de contratos do sector público e o seu réxime xurídico virá determinado polas estipulacións previstas no propio convenio e os principios xerais resultantes da citada Lei.

A tramitación do presente convenio é ordinaria e existe crédito suficiente previsto na Lei 4/2025, do 23 de decembro, de orzamentos xerais da Comunidade Autónoma de Galicia para o ano 2026.

NOVENA.- LITIXIOS.

As cuestións controvertidas xurdidas sobre a interpretación, modificación, resolución e efectos que puideran derivarse da aplicación do presente convenio deberán ser solucionadas pola Comisión de Seguimento á que se refire a cláusula quinta anterior. Se non se puidera alcanzar un acordo, as posibles cuestións litixiosas serán de coñecemento e competencia da orde xurisdiccional contencioso- administrativa.

DÉCIMA. AUTORIZACIÓN PARA A PUBLICACIÓN DOS DATOS DOS ASINANTES NO PORTAL DE TRANSPARENCIA

Consonte ao establecido nos artigos 12 a 16 da Lei 19/2013, do 9 de decembro, de transparencia, acceso á información pública e bo goberno, en concordancia cos artigos 24 e 25 da Lei 1/2016, do 18 de xaneiro, de transparencia e bo goberno, os asinantes outorgan o seu consentimento para que os datos persoais que constan no convenio e no resto das especificacións contidas no mesmo poidan ser publicadas no Portal de Transparencia e Goberno Aberto.

E para que así conste, en proba de conformidade e previa a súa lectura, as partes asinan o presente convenio por triplicado exemplar e a un só efecto no lugar e data ao comezo indicados.

Pola Consellería do Mar

Pola Fundación Nueva Pescanova

A conselleira do Mar

O presidente do padroado

Marta Villaverde Acuña

José María Benavent

ANEXO I
CADRO RESUMO DAS ACCIÓNS PROPOSTAS E O SEU ORZAMENTO

| Concepto de gasto | Orzamento convenio IV Foro GSSG | | | | | Total achegas con IVE |
|--|----------------------------------|--|---|--|-------------------|-----------------------------|
| | Achega da Xunta de Galicia | Achega Xunta de Galicia con IVE | Achega da Fundacion Nueva Pescanova | Achega Fundación Nueva Pescanova con IVE | Total Achegas | |
| Organización previa | 6.000,00 | 7.260,00 | 6.000,00 | 7.260,00 | 12.000,00 | 14.520,00 |
| Comunicación e captacion de asistentes | 12.500,00 | 15.125,00 | 12.500,00 | 15.125,00 | 25.000,00 | 30.250,00 |
| Sinaléctica, material e documentación asistentes | 6.000,00 | 7.260,00 | 6.000,00 | 7.260,00 | 12.000,00 | 14.520,00 |
| Servicio dixital e interpretes | 8.000,00 | 9.680,00 | 8.000,00 | 9.680,00 | 16.000,00 | 19.360,00 |
| Evento e persoal do evento | 14.000,00 | 16.940,00 | 14.000,00 | 16.940,00 | 28.000,00 | 33.880,00 |
| Catering, vixjes, comidas, transporte, aloxamento e seguro | 16.000,00 | 19.360,00 | 16.000,00 | 19.360,00 | 32.000,00 | 38.720,00 |
| TOTAL | 62.500,00 | 75.625,00 | 62.500,00 | 75.625,00 | 125.000,00 | 151.250,00 |